



basic education

Department:
Basic Education
REPUBLIC OF SOUTH AFRICA

NATIONAL SENIOR CERTIFICATE

IGREYIDI 12

ISINDEBELE ILIMI LOKUTHOMA LOKUNGEZELELA (FAL)

IPHEPHA LESIBILI (P2)

NOVEMBA 2010

IMITLOMELO: 70

ISIKHATHI: Ama-iri ama-2

Iphepheli linamakhasi ali-15.

YELELA

1. Umfundi kufanele afunde ikhaseli ngokukhulu ukuyelela ngaphambi kobana aphenhule imibuzo.
2. Ungalingi ukufunda iphepha lemibuzo loke. Qala ikhasi lokumumethweko elisekhasini elilandelako bese utshwaya iinomboro zemibuzo ebuzweko ngeencwadi ozifundileko kilomnyaka. Ngemuva kwalapho, funda imibuzo le bese ukhetha leyo ofisa ukuyiphendula.
3. Iphepheli LINEENGABA EZINTATHU:

ISIGABA A: Inovela (35)
ISIGABA B: Iindaba ezifitjhani (35)
ISIGABA C: Iinkondlo (35)
4. Landela imiyalo onikelwe yona ekuthomeni kwaleso naleso sigaba ngokuyelela okukhulu.
5. Phendula IMIBUZO EMIBILI seiyoke, MUNYE umbuzo KINOFANA ngiziphi iingaba EZIMBILI.
 - PHENDULA UMBUZO MUNYE KUSIGABA A
 - PHENDULA UMBUZO MUNYE KUSIGABA B
 - UKATELELEKILE UKUPHENDULA NANYANA NGIYIPHI IMIBUZO EMIBILI KUSIGABA C
6. Sebenzisa irhelo lokuhlola ukuqinisekisa bona yoke imibuzo uyiphendulile.
7. Tlola iinomboro zeempendulo njengombana zinjalo ephepheni lemibuzo.
8. Thoma isigaba ESINYE NESINYE ekhasini ELITJHA.
9. Isikhathi esiphakanyisiweko sokuphendula iingaba: Thatha okungenani imizuzu ema-60 kesinye nesinye isigaba.

IKHASI LETHEYIBULA LOKUMUMETHWEKO:

Ikhaseli lizokusiza abafundi kobana bakhethe imibuzo ebafisa ukuphendula ngayo ngaphandle kokufunda iphepha loke lemibuzo.

ISIGABA A: INOVELA		
Phendula NOFANA ngiwuphi umbuzo OWODWA.		
INOMBORO YOMBUSO	UMBUSO	IMITLOMELO
1. <i>UBonakele</i>	Umbuzo omude	35
NOFANA		
2. <i>UBonakele</i>	Umbuzo onemibuzo emifitjhani	35
ISIGABA B: IINDABA EZIFITJHANI		
Phendula NOFANA NGIWUPHI umbuzo OWODWA.		
3. <i>UZangenzani</i>	Umbuzo omude	35
NOFANA		
4. <i>UZangenzani</i>	Umbuzo onemibuzo emifitjhani	35
ISIGABA C: IINKONDLO		
Phendula NOFANA ngiyiphi imibuzo EMIBILI.		
5. <i>Licimile Ilanga</i>	Umbuzo onemibuzo emifitjhani	17½
NOFANA		
6. <i>Ngitlhuwile</i>	Umbuzo onemibuzo emifitjhani	17½
NOFANA		
7. <i>Isirholwani</i>	Umbuzo onemibuzo emifitjhani	17½
NOFANA		
8. <i>Ngibalabaliswa Nguwe!</i>	Umbuzo onemibuzo emifitjhani	17½

IRHELO LOKUQINISEKISA

Tlola itshwayo (✓) erhelweni lokuqinisekisa elilandelako ukuhlola bona uphendule yoke imibuzo elindelekileko.

ISIGABA	IINOMBORO ZEMIBUZO	INANI LEEMIBUZO EZOKUPHENDULWA	ITSHWAYO
ISIGABA A:		1	
UMBUZO 1	1		
UMBUZO 2	2.1 – 2.2.7		
ISIGABA B:		1	
UMBUZO 3	3		
UMBUZO 4	4.1 – 4.2.3		
ISIGABA C:		2	
UMBUZO 5	5.1 – 5.10		
UMBUZO 6	6.1 – 6.7		
UMBUZO 7	7.1 – 7.9		
UMBUZO 8	8.1 – 8.8		

ISIGABA A: INOVELA

Phendula umbuzo OWODWA kwaphela kilesisigaba (UMBUZO 1 nofana UMBUZO 2).

UMBUZO 1: *UBONAKELE* – M Sikosana

Umtloli usebenzise irarano (irarano langaphandle nerarano langaphakathi) ukusethulela umlayezo wenovela le. Tlola indaba engaba magama ali-190 – 240 ukusekela lokhu.

[35]

NOFANA

UMBUZO 2: *UBONAKELE* – M Sikosana

2.1 Fundisisa isiqetjhana esilandelako bese uphendula imibuzo.

"Ngiyezwa mnakwethu kodwana e ... ngizabasaphi laba engihlala nabo khona nje? Ngitjho e ..."

"Utjho uNaSilombo nomntwana uBafunani? Phana ungangitjela bonyana bafunani la emzinakho noNaMndebele?"

"E ... Sgwadi e ... "Kwatjho uMahlangu kodwana amezwi ala ukuphumela ngaphandle. "M ..." Athintithe ihloko uSigwadi, "Mnakwethu seabukuphendule bakwenza nje abantu? Sewaphenduka indoda enganamsebenzi, engakwazi nokucabanga njengendoda emadodeni. Sebakuphendule umfazi ngalendlela. Angikwazi unje Mahlangu, nomuzi wakho ngiwubone ngiseza kude bonyana awunaso isithunzi. Ungatjho bonyana unomfazi nawuhlala nomfazi onje? Ngibone ngisekude bonyana nokusindwa soloko kwagcina kusinde uNaMndebele. Amaboda azabe awiswe lizulu ngombana kuyabonakala bonyana akunamfazi la kwakho. Kunjalo nje angiboni bonyana ngingangena ngaphakathi kwendlu yakho le," kwatjho uSigwadi. Bakhuluma ngendaba le aboMahlangu kwabe kwaba ngemva kwamadina. USigwadi wathi uyakhamba akafuni ukungena ngendlini ngombana nokudla okuphekwe nguNaSilombo akaboni bonyana angakugoma. UMahlangu wamrabhela wabe wavuma bonyana uzakulala kodwana ngelanga elilandelako uzakuvuka ekuseni angene indlela.

- | | | |
|-------|---|-----|
| 2.1.1 | Ngubani okhuluma noMahlangu esiqetjhaneni esingehla? | (1) |
| 2.1.2 | Ngubani umntwana kaNaSilombo? | (1) |
| 2.1.3 | Tlola amabizo AMABILI wabafazi bakaMahlangu. | (2) |
| 2.1.4 | Unina lakaBonakele wazipha inarha waya kuphi? | (1) |
| 2.1.5 | USgwadi bekahlala kiyiphi indawo? | (1) |
| 2.1.6 | Dzubhula umutjho obuya esiqetjhaneni esingehla otjengisa kobana uMahlangu sele atjhugulukile ngendlela uSgwadi ebekamazi ngayo. | (2) |

- 2.1.7 Kuliqiniso kangangani kobana emzini wakaMahlangu akunamfazi? Sekela ipendulwakho ngomuda OWODWA. (3)
- 2.1.8 Tlola iinzathu EZIMBILI ezenza uBonakele aziphe inarha angasafuni ukuhlala kwabo. (4)
- 2.1.9 Ukuya ngokwesiqetjhana esingehla, ngonjani umuzi ongasithunzi? (2)
- 2.1.10 Abantu abalandelako bahlobana njani?
UNaSilombo, uBonakele noMahlangu. (2)
- 2.1.11 Ukuya ngokwesiqetjhana esingehla, kutjho ukuthini **ukuvuka ekuseni ungene indlela?** (2)

2.2 Fundisisa isiqetjhana esilandelako bese uphendula imibuzo.

Kwathi ngemva kwesikhathi esincani nje kwezwakala emaphepheni nemrhatjhweni bonyana uBonakele Mahlangu uzokubethana nesokana elivela ngaphetjheya kwelwandle bazokubanga unongorwana wephasi kwezeendubulo kilabo abasebangeni eliphakathi.

"Bonakele namhlanjesi uyindoda emadodeni, kodwana okunengi sizakukhuluma ngemva kobana sewulihlulile isokana ozobambana nalweli ngenyanga esizayithoma le. Ngiyathemba bona nawe sewuyazizwa neengazini bonyana uzalehlula. Akusinjalo ndoda?" kwabuza uKiller.

"Ngifisa ngathi ngabe sibethana khona kusasa lokhu okusako. Kade ngililindele ithuba elifana naleli. Namhlanjesi nami ngiyazizwa namtjhana ngilele bonyana ngiyindoda emadodeni. Abadala baqinisile nabathi ubudoda abukhulelwa. Namhlanjesi ngimi lo esele kutlolwa ngaye emaphepheni nosele aziwa kiyo yoke inarha njengekutana esakhulako?" Kwatjho uBonakele ngokukhombisa ukuthaba okukhulu.

- 2.2.1 Unongorwana ebekufanele abangwe nguBonakele nesokana langaphetjheya ungewani? (1)
- 2.2.2 Tlola iinrhatjhi EZIMBILI ezasetjenziswako ukukhangisa ukulwa kukaBonakele nesokana langaphetjheya. (2)
- 2.2.3 Ngubani uKiller okukhulunywa ngaye la? (1)
- 2.2.4 UBonakele umlingisi ozithemba khulu. Hlathulula ngokuzethembokhu ngokuqalisa esiqetjhaneni. (2)
- 2.2.5 Ingabe ukuya ngokwendatjana le, kutjho ukuthini ukuthi **umuntu uyindoda emadodeni?** (2)

- 2.2.6 Ngewakho umbono, ingabe nawumumuntu kuqakatheke kangangani kobana ubekezele? Hlathulula ngokuqalisa kumlingisi uBonakele. Ipendulo ayibe mimitjho EMIBILI. (4)
- 2.2.7 Dzubhula umutjho namtjhana amagama atjengisa kobana asikho isidingo sokuthi umuntu akhule bekabemdala ukuze enze izinto ezinengqondo nezibonakalako ezingenziwa babantu abadala. (2)
[35]

IMITLOMELO YESIGABA A: 35

ISIGABA B: IINDABA EZIFITJHANI

Phendula umbuzo OWODWA kilesisigaba (UMBUZO 3 nofana UMBUZO 4).

UMBUZO 3: *UZANGENZANI* – DM Jiyane nabanye

Ivalamlungwana

Ingabe umtlozi uphumelele kangangani ukukhetha abalingisi abanembako ukusethulela isizinda sendatjana le. Tlola indaba engaba magama ali-190 ukuya kwama-240 usekele ipendulwakho. Ungaqalisa kilaba abalingisi nawuphendulako:

UMatjhiyana, uGotjiwe, uSuhla noSasalenungu.

[35]

NOFANA

UMBUZO 4: *UZANGENZANI* – DM Jiyane nabanye

4.1 Fundisisa isiqetjhana esilandelako bese uphendula imibuzo.

"Lalela-ke Malinga. Mathi amakhulu weemponde engawabizako." Aphakamise imino emithathu. Abajuguje nesandla esitjengisa inenelo.

"Lokho kutjho bona makhulu asithandathu wamaranda nasele ngikuhlathululela ngesikhuwa. Yihlawulo yodwa leyo. Nangabe bayalobola ngathi ngifuna zithi iinkulungwana zeemponde." Aphakamise isandla soke. Akhuze ababaze uMalinga.

"Hayi uvukile Ntuli. Uvuke kokuvuka Mhlalukwana. Yimali leyo. Mbala unetjhu. Ikosi nayivuma ngaleyo mali ungabe uyozi funela isikghurukghurwana esisathe tjha," kubabaza uMalinga. UNaMaredi naye aleke phezulu.

"Utjho lapha ngatjho khona mntwekosi. Nami ngamtjela njengobana utjho nje. Qala abangani bakhe sebaneenkoloyi boke, yena solo usabetha phasi ngobhadu usobantabami. IMamelodi le seyimhleka yoke nje," kufakaza uNaMaredi.

Angakaphenduli, asikime uNtuli angene ngendlini. Abuye. AQale uMalinga ngemehlweni. Uphethe amaphetjhana ngesandla. "Cala la Malinga." Amnikele. Afunde uMalinga. Abone sokuthoma isitlankana esitjhoko bona uNtuli uboleke imali engangeenkulungwana ezihlanu eFirst National Bank. Abone nesesibili esitjengisa bona ukhuphe iinkulungwana ezine wabambisa ikoloyi yomhlobo weHonda.

4.1.1 Ngeyani imali ekukhulunywa ngayo esiqetjhaneni esingehla begodu yimalini? (2)

4.1.2 Ngebakwabani abantu bakwaMhlalukwana ngokuya ngokwesiqetjhana? (1)

- 4.1.3 UNaMaredi ubelethwa kwabani isibongo? (1)
- 4.1.4 Tlola lokho uNtuli afuna ukukwenza ngemali yamalobolo. (2)
- 4.1.5 Ngewakho umbono, nakuthiwa ikoloyi isikghurukghurwana isuke iyikoloyi enjani? Hlathulula ngomutjho. (2)
- 4.1.6 Tlola amabizo wabantu abalandelako:
- (a) Ibizo lesokana elona uCynthia. (1)
 - (b) Ibizo lesokana lakaCynthia lobusokana. (1)
 - (c) Isibongo sabakhozi bakaNtuli. (1)
 - (d) Isibongo somngani kaNtuli owakhweza uCynthia lokha nakaqothwa kwabo. (1)
- 4.1.7 Ngokwesiqetjhana esingehla, ingabe uMalinga utjho ukuthini nakathi 'uNtuli uvuke ukuvuka'? (2)
- 4.1.8 Ngewakho umbono, ingabe amalobolo aqakatheke ngani ebazalini bomntwana womntazana. Hlathulula ngemida EMIBILI. (4)
- 4.1.9 Ngokwesiqetjhana esingehla, ingabe lokhu okulandelako kutjho ukuthini:
- (a) Ukubetha phasi ngobhadu? (2)
 - (b) Isikghurukghurwana esithe tjha. (2)
- 4.1.10 Ingabe ngokubona kwakho bekufanele na kobana uNtuli aqothe indodakazakhe ngesizathu sokobana isidisi? Ipendulwakho ayibe mimida EMIBILI. (4)
- 4.1.11 Kunabantu abathethe ilobolo balenza irhwebo. Uthini wena ngombono lo? Beka imibonwakho ngemida EMIBILI kwaphela. (4)
- 4.1.12 Tlola isizathu ESISODWA esabe singathabisa uNaMaredi nange umntazana wabo, uCynthia, angalotjolwa. (1)

4.2 Fundisisa isiqetjhana esilandelako bese uphendula imibuzo.

"Nali isango mntazana. Phuma! Ngithi phuma!" Mbala ngokutjhotjhozana azirhudule uCynthia aye emthwadlaneni olicutjana lapha esitaradeni.

- 4.2.1 Ngubani okhupha uCynthia kabuhlungu kangaka? (1)
- 4.2.2 Hlathulula bona kwenzakaleni nakuzakufika lapha uCynthia sele aqothwa khona. (2)
- 4.2.3 Wena nangabe bewunguCynthia, bewuzokwenzanjani nawuqotjhwa ngakwenu? (1)

[35]

ISIGABA C: IINKONDLO

Kilesisigaba phendula imibuzo EMIBILI kwaphela.

UMBUZO 5

Funda ikondlo elandelako bese uphendula imibuzo.

Licimile Ilanga – A Mnguni
(Ngokulala kweNgwenyama ikosi uMabusabesala II: 1992)

- 1 Besihlezi kamnandi,
- 2 Sifukanyelwe nguwe,
- 3 Singezwa amakhaza,
- 4 Singezwa lothe.
- 5 Gadesi akusesenjalo,
- 6 Ilanga licimile,
- 7 Licimile ilanga.
- 8 Isitjhaba soke savelelwa,
- 9 Kwahlaluka bona ngeze
- 10 Kwaphilwa.
- 11 linhliziyo zarhohlomela,
- 12 Zigubuzeswe budisi bephasi,
- 13 Amehlo asala amlambokazi.
- 14 Sizakulibala njani
- 15 Ilothe liziphe amandla nje?
- 16 Lizakukhandelwa ngubani
- 17 Isitjhaba sibuthakathaka nje?
- 18 Ngawe savuka ebuthongweni,
- 19 Ngawe indlela yakhanya,
- 20 Yakhanya kanye tere!
- 21 Sakwazi ukuphila sagadanga
- 22 Siqale phambili umkhanyo ukhona.
- 23 Gadesi uphi?
- 24 Besihlezi kamnandi
- 25 Singazi bona liyokufika ilanga,
- 26 Ilanga ngitjho eliginya nelanga
- 27 Isitjhaba sisale sisodwa.
- 28 Gadesi siyazi ngombana
- 29 Licimile ilanga.

- 5.1 Imbongi sengathi inomuntu ekhuluma naye. Ngokuqalisa emideni emibili yokuthoma ngubani imbongi ekhuluma naye lo? (1)
- 5.2 Ingabe uMabusabesala wahlongakala ngamuphi umnyaka? (1)

- 5.3 Kunebinzana lamagama imbongi elisebenzisileko elitjengisa bona iNgwenyama uMabusabesala ayisekho ephasini. Dzubhula ibinzanelo. (2)
- 5.4 Ibinzana olidzubhule ekondlweni EMBUZWENI 5.3 lisithombengqondo bani? (2)
- 5.5 Dzubhula umutjho OWODWA endimeni yesibili otjengisa bona abantu balila khulu. (2)
- 5.6 Ngokubona kwakho, imbongi ifuna ukusitjelani nayithi,
Ngawe savuka ebuthongweni,
Ngawe indlela yakhanya, (4)
- 5.7 Ukuya ngokwekondlo engehla, ingabe imitjho elandelako imumethe ziphi iinthombe-ngqondo?
- 5.7.1 Ilanga ngitjho eliginya nelanga. (1)
- 5.7.2 Iinhliziyi zarhohlomela. (1)
- 5.8 Hlathulula ngommoya wekondlo le ngemida EMIBILI kwaphela. (2)
- 5.9 Imbongi inqophise kibobani nayisithi, 'Besihlezi kamnandi'? (1)
- 5.10 Imbongi beyisebujameni obunjani lokha nabeyitlola ikondlo engehla le? (½)
[17½]

NOFANA

UMBUZO 6

Fundisisa ikondlo elandelako bese uphendula imibuzo.

Ngitlhuwile – JN Malobola

- 1 Ngijamile ngithule ngithe du,
- 2 Ngijamile nje ngiyaqalaza,
- 3 Ngiqalaqala ummango,
- 4 Imimango engikhe ngayikhamba.
- 5 Namhlanjesi ngitlhuwile,
- 6 Amahlathi nemimango kuyile,
- 7 Kuye akusabonakali nomfuyi,
- 8 Sese ngijame ngibambeke njengomloyi.
- 9 Emmangweni kwakulila imitshere,
- 10 Kwakulila iketeza nokhubayi,
- 11 Kwakumimihla yethando elivutha komlilo,
- 12 Libopha abantu ikatha.

- | | |
|----|---|
| 13 | Imirwibili itjhagala emahlathini, |
| 14 | Ibetha imilozi njengeentjeheli |
| 15 | Zisoma imidzidla |
| 16 | Ummango ungaboni ukoma. |
| 17 | Ngitluwile, ngihlulukele umnombela, |
| 18 | Iye, umtshadlho nomvilo |
| 19 | Ngihlezi ngaphasi komtholo. |
| 20 | Gadesi uphi ummango? |
| 21 | Uphi wekhethu umlanjana? |
| 22 | Ngisele amakhaza njengerhwaba. |
| 23 | Ngipholise ihloko eqaqamba njengezulu, |
| 24 | Iqaqamba inganaduma. |
| 25 | Ngithi uphi wekhethu umlambo? |
| 26 | Ngisuse ukutjhisa nenyora. |
| 27 | Ngisele aphole njengesithundu sethwaswa, |
| 28 | Kiwo ophakela imizi nemizana. |
| 29 | Ngitluwile, ngitluwele umraga, |
| 30 | Lapha bekudla zabokhokho, |
| 31 | Inarha isese liphasi, |
| 32 | Iphasi lokuphila. |
| 33 | Isigume kwakusese mphako |
| 34 | Womkhambi akhambela ukubuya. |
| 35 | Imbicani nomsobo zisese sitjhebo sokulingana, |
| 36 | Ihloko isakhula nomzimba. |
| 37 | Iye, iinthebe zihlwa ziphuphuma, |
| 38 | Iye, imitlhodlho ihlwa imanzi, |
| 39 | Iye, unotlabalala arhanyulwa angaselwa. |
| 40 | Iye, ngitluwile, layizolo likude. |

- 6.1 Imbongi itluweleni ukuya ngokwendima yokuthoma? (1)
- 6.2 Tlola amagama wemirorho EMIBILI esetjenziswe yimbongi ekondlweni le. (2)
- 6.3 Ingabe imida elandelako imumethe ziphi iinthombe-ngqondo?
- 6.3.1 Ngiphole njengesithunzi sethwaswa. (2)
- 6.3.2 Libopha abantu ikatha. (2)
- 6.4 Ingabe khuyini okuzwisa imbongi ubuhlungu endimeni yesibili. Ipendulwakho ayibe mimida EMIBILI. (4)
- 6.5 Ngokubona kwakho ingabe kuliqiniso kangangani lokhu okutluwisa imbongi? Ipendulwakho ayibe mimida engadluli KWEMINE. (4)

6.6 Tlola ubukondlo obutholakala emtjhweni olandelako:

Iye, ngitluwile, layizolo likude!

(½)

6.7 Ukuya ngokwekondlo engehla, kusuke kwenzekeni nakuthiwa 'umuntu unenyora'?

(2)

[17½]

NOFANA

UMBUZO 7

Fundisisa ikondlo elandelako bese uphendula imibuzo.

Isirholwani – JN Malobola

- 1 Lizungu labantu boke,
- 2 Silingana abantu boke,
- 3 Mphekeleli wabaya kibobamkhulu,
- 4 Mrhuweleli wetjhada elibaleka iindlebe.
- 5 Sidosa umuntu isikhathi sifikile,
- 6 Iye, nofana singakafiki.
- 7 Abanganeno bagida igido
- 8 Lokuzibuyisela ngombana badlelezelwe:
- 9 Ilizwi lesililo lizwakala ngaphetjheya,
- 10 Wegazi elimbi avuthe amathambo,
- 11 Atjhe aphele kungakalinyukwa.
- 12 UNotjhu du athi asafuthunyezwa,
- 13 Kuye sephulwe isirholwani.
- 14 Icala ligwetjwa linengi; umbulali uyedwa.

7.1 Khetha igama elilodwa kila angesibayaneni.

7.1.1 Isirholwani kilekondlo sitjho (Isirholwani sabomma, Itayere okutjhiswa ngalo abantu, Ukufa kwakaNotjhu du)

(1)

7.1.2 Isirholwani kilekondlo silitshwayo (lokufa, lesiko, lokuphila).

(1)

7.2 Ngokwekondlo engehla, ingabe imbongi inqopheni nayithi **kibobamkhulu**?

(1)

7.3 Tlola umqondo wekondlo otholakala emideni 10 – 13. Ipendulwakho ayibe mumuda.

(2)

7.4 Ingabe imbongi itjho ukuthini ngomuda 14 ekondlweni engehla. Ipendulwakho ayibe mumuda.

(2)

7.5 Imbongi ihlathululani ngoNotjhu du?

(2)

7.6 Phawula ngommoya wekondlo engehla le. Ipendulwakho ayibe mimida EMIBILI.

(4)

- 7.7 Ingabe imbongi itjho ukuthini nayithi, 'isirholwani lizungu lomuntu woke'? (2)
- 7.8 Dzubhula isithiyeleli esitholakala ekondlweni le. (½)
- 7.9 Tlola kobana umutjho olandelako umumethe sippi isithombe-ngqondo. Sekela ipendulwakho.
- Mphekeleli wabaya kibobamkhulu (2)
[17½]

NOFANA

UMBUZO 8

Fundisisa ikondlo elandelako bese uphendula imibuzo.

Ngibalabaliswa Nguwe! – JT Jiyane

- 1 Sekuminyaka sisoke,
- 2 Sisiwa sivuka sibona sicimeze,
- 3 Bavela bagadunge njalonjalo.
- 4 Wangithembisa ukufa nokuphila,
- 5 Kwatlhurha lehliziyo
- 6 Ngasabana nalo ngiqale wena.
- 7 Wangibopha ihliziyo,
- 8 Ngaphola amaloyo,
- 9 Ngahluba njengenyoka,
- 10 Ihluba ikhasi layo,
- 11 Kwakhanya inyanga
- 12 Isiyeri sakhanyisa indlela.
- 13 Nami ngesabana nokufa nokuphila,
- 14 Ngakubabalela saqanda,
- 15 Iye, kungilo iqanda.
- 16 Ngaliphatha ngisabana nalo,
- 17 Ngiqale ubuhle balo,
- 18 Ukuphadlheka kusizilo.
- 19 Ubuzikazikani bezandla kubika,
- 20 Kubika ukoma kwesilongwe,
- 21 Somele ukuvela amagazuka,
- 22 Kutjho ukusasamba kweqanda,
- 23 Kudabuke yami ihliziyo,
- 24 Kucime ilanga.
- 25 Ngifuze ilitje
- 26 Ngifuze umlotha
- 27 Wehlule ukufa
- 28 Wehlule ipilo.

29	Walilahla ithemba lami,
30	Wasiphula isithembiso sami.
31	Wasiphula isithembiso sakho,
32	Ukufa nokuphila
33	Ngibalabaliswa nguwe.

8.1 Ingabe imbongi ikhuluma ngobani kilekondlo? (1)

8.2 Emudeni wesi-5 ngiliphi igama imbongi eleqileko? (1)

8.3 Hlathulula umqondo owethulwa mumuda woku-1 nowesi-2 wekondlo le. (4)

8.4 Tlola iinthombe-ngqondo ezimumethwe mimida elandelako:

8.4.1 Wangibopha ihliziyo (1)

8.4.2 Ngakubabalela saqanda (1)

8.5 Ingabe imbongi isebenzise itshwayo liphi ukuveza ukuphela kwepilo? Kubayini utjho njalo? (3)

8.6 Hlathulula ummoya wekondlo le. Sekela unqophise ekondlweni. Ipendulwakho ayibe mimida EMIBILI. (4)

8.7 Tlola kobana imbongi itjho ukuthini nayithi, 'Walilahla ithemba lami'. (2)

8.8 Tlola ubukondlo obutholakala emtjhweni olandelako.

Iye, kungilo iqanda. (½)
[17½]

IMITLOMELO YESIGABA C: 35
INANI LOKE: 70